

## Хутбе 1

Алемлернинъ Рабби олгъан, ич бир шейге бенъземеген, ерсиз бар олгъан, башлангъычы ве сонъу олмагъан Аллахкъа хамд, Ресуллернинъ энъ шеревлисиде олгъан Мухаммед Пейгхамберимизге салаят ве селямлар олсун.

Сайгъылы мусульманлар!

Бугуньки хутбемиз Мевлюд акъкъында оладжакъ.

Рабиуль-эввель айнынъ 12-нджи куню мусульманлар ичюн гузель ве хайырлы бир кундир. Шу куню яраткъыларнынъ энъ фазилетлисиде ве Аллахнынъ энъ севген къулу Мухаммед Пейгхамберимиз дюньягъа кельди. Бу мубарек кунни къайд этмек - бутюн Ислам дюньясында яхшы бир адет олып къалгъан. Бу кунде Мевлюд-и Шериф окъулыр, чешит садакъа ве хайырлар дагъытылыр, гедженинъ берекетинден файдаланылыр. Кене бу кунде топланып берабер окъулгъан Мевлюд-и Шерифнинъ берекетинден эр кес файдаланылыр.

Пейгхамберимиз Мухаммед салляллаһу алейһи весселлем Филь йылында догъды. О йылда олып кечкен «филь вакъиасы» Къур'ан-и Керимде «Эль-Филь» суресинде анылатылды. О вакъытта Пейгхамберимизнинъ къартбабасы Меккенинъ реиси ве къаравулы эди. Кябени йыкъмагъа истеген Абраха адлы къафир падишах, бир чокъ аскерлер алып, Кябенинъ алдына кельди. Аскерлернинъ башында филлер бар эди. Филлери олгъан аскерлер о вакъыт пек кучлю эди, Арабистан тарафларында филлер пек аз эди, Амма Аллаһу Та'ала Кябени къорчалады. Абраханынъ аскерлерини эбабилъ къушлары келип таш атып ольдюрдилер. Пейгхамберимизнинъ догъгъан кунюнде, йыллар девамында сувнен толу олгъан Совет адлы голь къуруды ве о заманда атешке табынгъан междусилернинъ бинъ йыл янгъан атешлери сэнди. Бизим сайгъылы Пейгхамберимиз догъгъан вакъытта дюнья нургъа толды.

Мевлюд-и Шериф акъкъында язгъан базы алимлер шойле анылаттылар: Вехби къызы Эмине Реджеп айынынъ ильк геджеси олгъан джума геджеси Пейгхамберимизни къарнында ташып агъыраякълы олды. Агъыраякълыкъ алыны Пейгхамберимизнинъ анасы бойле анылатты: «Оны ташыгъанда ич агъыраякълы олгъанымны ве бир агъырлыкъ ташыгъанымны, башкъа апайлар дуйгъанлар киби ич бир шей дуймадым. Бир куню юкъусырагъанда манъа бир киши келип, «Агъыраякълы олгъанымны дуйдынымъ?», деп сорагъаныны хатырлайым. Мен санки: «Ёкъ!» деп джевап бердим. О манъа деди ки: «Сен бу умметнинъ Эфендисиде олгъан Пейгхамберни къарнында ташыйсынъ». Пейгхамберимизнинъ догъгъан куню (базарэртеси) онынъ анасы Эмине деди ки: «Оны догъургъанда ич бир зорлукъ чекмедим. Оны догъургъан вакъытта, шаркъ ве гъарп арасындаки ерни айдынлаткъан бир нур пейда олды. Пейгхамберимиз суннетли догъгъандан сонъ, эллерини, тизлерини ерге къойып, башыны котерди».

Сайгылы мусульманлар! Пейгамберимизнинь догъган кунюни биринджи кере иджреттен 600 йыл сонъ къайд эттилер. Мевлюдны окъуткъан биринджи инсан - Ирбиль укюмдары Эль-Мелик-уль-Музаффер олды. Бу укюмдар алим, джесюр ве джумерт, Аллаһтан къоркъкъан бир инсан эди, онынъ бир чокъ къыйметли эсерлери, китаплары бардыр. Бу укюмдар, Рабиуль-эввель айнынъ 12-нджи куню буюк байрам япып, бинълердже айван сойып, мусульманларга татлылар дагъытты. О девирде шаркъ ве гъарпта олгъан алимлерден ич бириси бу арекетни ред этмедди. Даа сонъра гъарпта ве шаркъта яшагъан мусульманлар бу адетни девам эттирдилер.

Пейгамберимизнинъ догъган кунюни къайд этмек – гузель бид'ат, яни динимизге кирсетилген гузель янъылыкъ сайылыр, базы инсанлар айткъаты киби, бу – ярамай бид'ат дегильдир. Бу мубарек куньлеринде хайырлы амеллер чокълашыр, мусульманлар бир ерде топлашып, Аллаһнынъ адыны бол-бол зикр этерлер ве Пейгамберимизнинъ догъумыны анълатырлар. Бунлар эписи динимизге уйгун, терс дегильдир.

Лякин базы мевлюд китапларында динимизге къаршы олгъан шейлер бар. Месея, бир мевлюд китабында шойле язылгъан: «Аллаһ юзюндеки нурдан бир парча алып онъа «Мухаммед, ол» деди ве о нур парчасы да Мухаммед олды». Бильмек керекмиз ки, Аллаһ нур я да онъа ошагъан шей дегильдир. Мухаммед Пейгамберимиз нурдан яратылмады ве Аллаһтан бир парча дегильдир!

Аллаһ, ерлерни яратмаздан эвель бар эди ве ерлерни яраткъан сонъ да мекянсыз оларакъ бардыр. Аллаһны акъыл, фикир я да хаялнен тасаввур этмек мумкюн дегиль.

Базы мевлюд китапларында расткельген янълыш ибарелерден бири де: «Пейгамберимиз яратыкъларынынъ энъ биринджиси» олгъаныны айталар. Бу ибаре Къур'анга терстир, чюнки Аллаһу Та'аля Къур'ан-и Керимде буюра:

Бу аетте Аллаһу Та'аля бутюн джанлыларны сувдан яраткъаныны бильдирди, яни сув – бутюн яратыкъларнынъ эсасыдыр. Базы арап улькелеринде муэззинлер эзан окъугъанда айталар: «Саят ве селямлар сенинъ узеринде олсун, эй, махлюкътнынъ эвели ве ресулленинъ сонъу». Бойле айтмакъ олмаз, чюнки Пейгамберимиз Аллаһнынъ ильк яратыгъы дегильдир.

Эй, мухтерем мусульманлар, бойле мубарек геджелерде, бизге дюнья ве ахиретте файда кетиреджек ильмимизни, бильгилеримизни арттырмакъ керекмиз. Япкъан хайыр ишлеримизде Пейгамберимизнинъ ёлуны тутмакъ керекмиз.